



脩竹編

旅聲

系綠齋

筑語

葛震甫詩集序

脩竹編原序

太泌山人李維楨撰

梁沈約有彈甘蕉文其略曰長兼淇園貞幹臣脩竹
言姑蘇臺前甘蕉一藁宿漸雲露荏苒歲月臺西階
澤蘭萱草爲蕉攢莖布影獨見障蔽雖處臺隅遂同
幽谷請以見事徙根剪葉斥出臺外庶懲彼將來謝
此衆屈此以文滑稽當自有所指必曰姑蘇臺或其
人產於是耳今天下詩人莫盛于蘇郡畹蘭背萱不
多得而類甘蕉者寔繁有徙余所見葛震父詩凡數

種按之約所謂與會標舉體裁明密浮聲切響輕重
悉異以情緯物以文被質清辭麗曲時發乎篇非震
父熟當此者乎間嘗卽脩竹以擬震父之詩其遵用
古法初終一致如竹箭之筠貫四時不改柯易葉也
其諧和中律如嶰谷箛金門管柯亭椽笛慈母鼓吹
也其觸景卽事因應無方莫不相肖如荆之笛籥楛
楊之篠簜少室之甌釜叩之扶老篔簹之布篋戴凱
之譜六卜有一各有取裁適宜也其色明秀如粉苞

赤箬彤竿綠筒爲斑爲蒼琅爲黃金斐然成章也其
氣骨健鋒穎銳如劬任矛管任柱篋筭任甲沙麻任
弓林箴任刺擊也其清脫如玉潤碧鮮崖憐拂石神
貴掃壇也其姿致如檀欒夾池便娟受月倚靡從風
也其細緻如簣如苞其圓滑如流黃如桃笙其雋永
可餐如越駱之筒練實之資鳳食也其變而多竒如
化龍栖鸞連理紫腕和氣感而甘露降也蘭可服媚
萱可忘憂舍此兩者誰爲作對彼其之子哆口談詩

修竹編序
若吳亡時姑蘇之臺荆棘縱橫麋鹿狐兔所栖托不足望甘蕉萬一而况可與震父較清濁長短耶人亦有言草木臭味愛惡同之欲屏除甘蕉爲蘭萱地自是情理之正然而蘭護力不能勝甘蕉雖有百甘蕉曾不能勝一脩竹故惟脩竹然後可以庇蘭萱杜甘蕉之口則莫若貴重竹比千戶侯而引蘭萱同升之爲得也鍾嶸品沈約詩見重閭里誦咏成音余以震父詩傳誦吳市家喻戶曉洗濯里耳還歸大雅庶幾佩國香而帶宜男者知一日不可無此君休文彈事收功百世之下九京可作當爲姑蘇吐氣矣

脩竹編

震澤葛一龍震甫著

雲間陳繼儒眉公校

歲暮渡湖

出門不敢望一白數千頃
杲日無暖氣霜鴻遞高影
惟冰取船路半渡却愁暝
歲事復何如勞勞去鄉井
靈巖山下尋殷叔宅不遇伊姪留宿

帶湖仍負郭隱處一峰青
薄暮寺中去遠舟門外停

地荒風走葉雲裂水搖星小阮醉山客纍纍空數瓶
黃四夜過湖上
小舟撐入門前港君在病中予夢中打門聲急躍然
起月明光光霜地空此時懽歌忽淚墮此時沈飲復
醒坐世路悠悠將奈何一散晨星隔煙霧

再題湖上草堂

小堂自君起覆草亂不葺水日搖壁上凍溜融以濕
空鳥獨飛來主人杖藜出歷數門外山近遠五六十
晚次丹陽道中
枯楊根下凍痕交細竹陰連姊妹槁殘照半村村屋
閉短轅駑馬路遙遙

月夜胥母山南望

山木亂漁檣墟煙入混茫蕭蕭月寒氣搖搖冰夜光
神往亦不遠目窮徒自傷遞遲若有待落遍草根霜

山行

前山白雲起忽復失其處却看過來人曾與雲相遇

除夕巢飲閣遲王元直不至

開樓舉燧燭照見菱湖樹樹影曳雲帆東來復西去
不知江上客守歲對何人縱然明日到又是一年春

送張伯子遊武當山

五岳之外更有山特立在天上下垂一棧通人間今
君直欲躡高頂雲衣飄飄弄懸景春水春山春雪中
春燈豔雪梅花紅我醉君家送君去神鴉飛出湘南
樹

花朝見新燕

花開正賀花生日燕到還尋燕主人雙燕喃喃話花
影主人無恙又逢春

浮家美人

薄衣新綰苧蘿紗映水飄飄帶晚霞姘婦津來怯波
浪使君灘過洗鉛華迴風燕子嬌歌柳啖影魚兒逐
鬢花郎馬自嘶芳草去儂愁春共繞天涯

登金山

孤根不可測下挿空半透巉翠削鬼斧旋飈發神溜
江雲南北行於此或相湊龜老不應呼龍馴解聽呪
每眺契山衲將游禱川后盤盤歷磴閣面面啓窓竇
旣得審天險其誰信坤厚月出潮欲來風號石真鬪
煙雨作空濛還如蒞顛叟

寄周公美

溪雲載屋鶯啼晝溪漲浮花柳着綿門外小舟如意
去清齋人臥起茶煙

病中得元直書

白下君送我雖別不櫻念以爲十日後衡門結冰纜
坐聽除夜鷄臥見花朝燕一書何處來已過錢塘縣

送明生

還山幾多日分日共留連筍觸長林步花欺野寺眠
別生初霽曉情重暮春天婉變舟中語茶香渡柳煙

折花

折花人折却花枝損却春春從明日去風括初飛絮

仰竹錄
四
愁殺臨流送別時柳枝不折折花枝

水中觸髅石

妖狐戴觸髅寂照碧千頃誤突馮夷宮化作雲根冷
浮煙寫生氣觸浪發機警夜肅枕天空月來弔孤影

新月

朔雨移三宿初痕露半晴低低先暮靄遠遠帶秋清
西水泛恰好北窻眠未成藕花香數里猶自暗中生

送實甫弟之彭門因寄吳昌侯

送汝行行勿苦汝有故人在淮楚出門雖是不如家
家住深山只環堵湖船載酒夜帆飛醉臥船頭一布
衣使君門前五株樹到時正落粘衣絮

蔣生季昌得古鏡寶之予爲賦之

一片秦時月半開雲霧新曾悲堂上雪曾殉墓中春
燕小翻臺玉花寒溜水銀妍媸今莫辨將以照情人

雨中

也知無一事更覺雨中閒滌研就簷下掃雲清臥間

科頭長夏日得意半煙山已晚憑誰報松窻燕早還
長千秋和東生

長千秋秋風起葉落長干寺前水客舟如葉寄秋風
飄忽長干西復東

懷張先生

雪照燈前酒春肥澗底芹爲驪難再宿相問數煩君
百里只見水一丘空臥雲月明橫棹好將已及秋分
放舟龍女祠候月

偶來祠下泊笑語煙冥冥客藉露花白神移秋火青
溯光衣着冷積氣樹含腥斟酌看山具今宵付月汀
子夜舟中聽吳歌

交加樹裏移高岸秋水如空秋夜半客眠已是酒醒
時百轉離腸爲誰斷越舟吳女竹枝歌唱過朔山月
不多

甘露寺

幾多城外路一面江南山墮石斜撐岸奔潮怒觸關

脩竹新
九
齏煙沈楚碧禪誦帶吳蠻洲渚年年長秋生蘆荻間
浮家

秋色曳浮家五湖非一涯漫游君不見爲樂此何加
雨纜山根樹煙燈寺裏花幾從鳧雁宿霜氣上蒹葭

遲東生

日歸曾寄書情況近何如幾醉秦淮酒一年蕭寺居
夜長人別後秋好月來初倚棹碧天暮溪中聞打魚
曹吉甫徐克勤同沙美人宛在訪予湖上酬以

短歌

微風暖吹雲水香柳霜半染春枝黃何來解珮波間
女混作垂鞭馬上郎下馬尋予蘿逕裏蘿蔦牽衣行
且止山家不識五侯鯖瓦缶惟供二泉水酌水拈花
秋葉傍曾聽月笛叫清霜也知花月情多少山水之
交情更長門外雲分山處處馬嘶促別那能住細語
徘徊向夕陽夕陽正照吳江樹

夢聖僕

春來夢君處多在百花裏花落香吹衣水田波浪起
昨夜秋鳴小院風梧黃蕉綠委叢叢一年將盡不相
見空向夢中言夢中

焦山懷古

險觸無安流孤懷緬高達言尋處士山因舍寓公筏
漢詔懸日星隋構隱松栝天闕駕靈鼉風巢墮驚鶻
岸勢對若剖江面此爲狹人去轉風厲僧貧懼洲塌
雲還洞簷濕日躍海門豁鶴銘埋浪中霜後始堪搨

聞元直重到白門

居停非一處處有棲鴉欲別每遲我重來如到家
病攜霜柳色愁拗秋棠花日落天更遠青青湖水涯
許元熒招過漁莊看芙蓉

隔水芙蓉美影寒一枝分作幾枝看花間亭子亭亭
小只許幽人自倚闌

路入漁村處處花半欺霜葉半攙霞佳人罷采挈船
去寂寞橫塘第幾家

張先生挽詞

風美尊菰饌交忘蒲柳年寄聲三伏後爲約五湖邊
忽爾將浮世悠然等逝川赤貧應到骨素業祇餘瓊
旅櫬那能舉官逋尚待蠲獨來辜宿莽飛淚濕蒼煙
不然

寄遂園主人

不然今夜宿江村風雨聲中竟斷魂誰道解維還艤
楫綠窓紅燭對花尊

爲園無百畝百雉列前楹嘉樹半臨水好山多在城
樓頭臥花影雪裏聞鶯聲每坐夜星落每來春草生
幽情如可托自把秋雲英

哭卜伯符

洞庭人流寓金陵
官萊州卒于官

幾迴相訊幾蹉跎澤國江天帶海波千里蕭條迎養
薄一官辛苦救荒多空囊剩有文通恨野哭應翻叔
度歌花下壚頭舊游處可堪乘月再經過

訪張子明溪上

秋響落高雁早寒生敝廬清流帶郭遠黃柳傍橋疎
獨契竟誰與一貧無不如隔年相念苦曾得幾行書

周處臺秋望

一坏臨睥睨曾以孝侯傳霜下江流去秋還滯客邊
尋莊靜父于長干寺

青溪溪上別不記乃何之霜草獨行路雨燈殘對時
寄聲無到處得病念歸遲秋滿南朝寺相尋喜在茲
許章甫以周服卿畫松贈眉公命予作詩

長松歷落青氤氳垂蔭之下多芳芬古石盤根漱香
瀑壓枝閣日日不曛巖壑丰神自表表人間桃李何
紛紛有時蒙茸挂僧衲有時綽約來仙裙峨眉雪色
太山雨九際雷聲七嶺雲白雲不出山清風憺爲君
寒齋靜抱月明臥松子打窓誰共聞

題肇禧水湄居

所居居水湄結構簡而素不侈充棟書野史兩三部
不藝百雜花石竹三四箇醉臥看山雪清吟攬月樹

亦有秦淮姬夜歌此從溯

鶴林寺

戴公山下路迤邐入荒煙背嶺夕陰早薄江林氣鮮

蕭然前代寺際此季秋天不是春游者還來問杜鵑

呂家莊聞笛

石立却過松樹長水流遙帶木樨香望江亭上秋風

笛吹裂吳天正練霜

訪宋比玉答贈

心聲謬相信遠托蘿薜親一面始于此五浮曾問人

後霜籬外柳早醞江南春來往甃爲記久居須買鄰

斷髮詞爲楊麗人賦

鴉色盤雲雲欲流朝朝阿母教梳頭自憐影好常臨

鏡未許人看懶下樓樓上盈盈非昨矣一半春雲鏡

中委寄語情癡莫近前剪刀快似秦淮水

秋末俞園夜集同鍾伯敬諸公賦

霽新前約好閒勝悉林幽復此露霜夜宛臨雲雁洲

水容鮮傳月花事冷延秋石罅風搔葉廊陰燈在舟
彌令性情遠誰暇理清謳

莫愁湖

一水石城邊名借盧家婦一歌石城曲至今誰得和
酒樓出高柳艇子邁輕霧人去幾年年年愁日暮

得聖胎燕中書

不知易水畔幾浣客衣塵畏說薊門外又生榆葉新
悲歌誰擊筑垂橐似游秦未盡書中語匆匆馬上人

孫照鄰夜集顧亭亭閣上得酒字

阿閣啓初夜爲懽集賓友賓友非一方如期獨予後
細聽盧女曲復醉孫郎酒籠燭豔重花簷星蕩疎柳

龔長安挽詞

學仙豈諱死死乃換其骨聞君病革語諄諄恐無及
生者以情誤奔號蓋棺日是日滿城雨縞素盡沾濕
蓋棺亦何爲或卽空棺去文心與熱腸置此於何處
何處問鄉園海空天一寓散落蔣山雲綢繆幔亭聚

十五夜聖僕比玉重集齋頭賦別時比玉病不能飲

十五城中月家家開夜窓寒生偏射客光動若浮江
關近雞聲早羣離雁影雙平時不飲可今夕負春缸

雪中別白門諸故人

九月廿二日

驟來江上雪催發遠歸人帶葉千枝響先花十月春
寒新衣未絮風揭面無塵積素知多少前車沒半輪
雨夜舟中懷實父弟

風急雨聲亂颯來愁滿天不知飄泊處可有故鄉船
歸路關前夢殘更枕上年半生兄弟念多負看山眠

臘八日葑山僧舍

一歲兩入日臘于今日逢客來同懺佛帆度各迎鍾
新築侵雲水虛廡掩雪松及齋予且問米汁乃誰供
黃伯傳自皖城來守歲晚香亭得醒字

酒白燈熒熒此時那可醒故人千里駕殘夜一周星
溫語各勞苦春風誰鬢青疎枝猶半藥舍凍倚山亭

人日雪永福山房送王先民還揚州

旬日尚餘三春從雪際探雲垂兼絮絮風定轉鬢鬢
曉色先雙樹離愁入半酣梅花歸處路相見憶江南
朱季子白雪齋宿別

呼盧夜雪錢爲酒襍被春雲宿似家曉起恐予留不
住門前遮却萬重花

包山寺閣夜看勞維明餅中古梅得開字
纔爲夜到客便得芙蓉梅影怪月難寫枝枯春亦來
東瓶分碧澗香雪挂蒼苔自爾山中臥山花幾遍開
賦得春草綠波送凝父

春情何可奈春色更如何細雨帆前膩東風柳半拖
將離傷獨遠相送恐無多明日茗溪上看山挂一簑
過澗戶傷金伯獻

春來人已去夢短夜何長澗上閒花落山中流水香
未寒雲臥處已老雪衣郎鷗鳥飛還下看予到野航

病目

山家籬落梅花雨，酒店橋頭柳絮天。
病目閉門惟課藥，一春狼藉過今年。

春來上巳日，
鳥語快未足，花晴氣如醉。
宵宵天際帆叢叢，水邊稊

莊靜父訪山中

來攜海上月，遠訪山中春。
月滿未三宿，春歸還一旬。
相逢覺自老，且住愛吾貧。
小酌茅檐下，閒花亦可人。

八公房雨夜送春得香字

山客到昏黃，山僧有石房。
樹枯藤借綠，花謝草能香。
莫及來朝語，須教此夜長。
年年風雨別，多半在孤航。

山夜與實父弟別實父之徐州予之白門明日
同發

寒燈不照遠光在，青蘿灣促膝坐相語。
寸心離別間，彭蠡里有井秣陵城。
半山去路各芳草，鬢看同日斑。

題畫

梅花何處開，開向月明處。
照影落空江，江流流不去。

會王曰常於水湄居醉歌相答

君到山中二月春春風作寒花尚貧何曾向我飲半
日却復爲誰眠一旬出山之時亦草草白門柳市聽
鶯早不見能成得見懽相知已被相思老小閣月上
風簾開花壓歌船蕩槳來主人留君卽拉我水湄主
人賢矣哉

包山寺閣聽泉同勞維明楊伯羽蔣季昌

一息數百轉氣秋山不昏全收衆籟響冷入孤松根

閣上堪獨倚醉中如與言幽人能樂此夜夜宿雷門
再過毛公壇同王扶搖作

微路更深入好山重數圍昔游如不及今到亦空歸
氣結白雲古雨荒朱菌肥毛公誰得見松葉滿人衣

寄何玉長

別時往真州亦復向吳下有客蘇堤來見君醉倚馬
太湖天爲防山雲出高浪君來乎山中逕渡莫相望

避暑金光菴

入門不知向面面松風清重陰空中落如水地上行
于此置一簞悔前勞半生斜陽在山背棲鳥已無聲
七夕送丘無爲之彭城因寄張七乙卯七夕張
七曾攜越姬寓湖上同賦七夕篇

移家之後未曾見見卽別予千里行况是人間七月
七空雲不動秋盈盈梧桐碧葉風吹下劈葉爲牋對
君寫寄語留侯山下人前年此夜何爲者

七夕飲明月軒

客亦有情癡停杯在此時漸多雲作態那更月如眉
涼意動初覺秋聲來不悲欲從靈鵲問竟夕但空枝

村中

棘門低掩漏燈光隣舍無人古廟荒風雨滿村秋冷
落柘條鷄宿草鳴蜩

葑山亭納涼

湖上孤亭對遠天夕陽分雨水橫煙乘涼客到香齋
散一半開船與攏船

山下雲生山上青南湖龍挂北湖腥雨來時候天應
晚猶得從容盡酒瓶

過戴顓隱處

在潤州獸窟山中
顓父卽安道先生

數峰深百折一豁際江天想象爲園處行吟繞寺邊
因貪獸窟險不顧雪溪田身隱名奚取時非代幾遷
向來元寂莫何況此其然老樹生秋鶻餘花照冷泉
小亭空一二亂石半題鐫游日偏易與買隣誰得錢
獨尋還獨去衣帶縮松煙

同眉公父子雨集伯彭園池

園開霜樹碧蕭蕭樹杪滄波挂飲巢客坐雨深通夜
氣花憐秋淡繞塘均寒暄以後孤舟別山水之間兩
世交情況幸同風味好蓴絲菰米出行庖

茅止生攜僧携妓訪予湖上時予客游他郡越

一年未報今復出山寄懷以詩

太湖秋漲綠平沙照影籬門竹半遮遠水忽來高士
問夕陽空下野人家兩山相待俱堪酒一葦同浮不

倚竹編
礙花今日題詩寄茗上隔年芳草又天涯

月渡

湖平不見水惟見此明月以月載孤舟遙遙向天末

將出門得舜五書

湖中欲雪雲皚皚樹罨撒冰船不開客遊正遠歲云

暮白酒鱸魚空寄來

臘月十七宿土橋夢林宗

野曠不知曉草霜連月明冷店無雞棲遠風收樹聲

使我足夢寐與君接神情河洛幾千里關山縱復橫
茫然衾枕間記憶如前生

勞維明乘月吳江來訪予篠園因訊周公美

遠舟何處泊一水月澄澄未識相尋路因同每到僧
影清行傍竹中熱飲宜冰幾就溪翁宿心言續舊燈
騎驢雪中懷乍別故人

恐予行或早隔夜過子眠把手出關去寒星猶在天
常年相送處冰憂枯楊樹見此各銷魂行還不能住

住卽路之岐歲除無幾時自吟驢背上風雪正離離
元旦煮仙掌茶對雪同實父季昌

元開猶是臘雪瑞滿山家冷欲全欺火清惟可鬪茶
仙人掌上葉高士林中花頭顱已如此隨意着年華

雪夜獨酌懷莊靜父

飄颻雜花新山寒雪照春勝情於酒近單飲覺燈親
不負此良夜倘能來故人白扉湖水上凍掩忽經旬

吳門夜宿送吳六朝海

自去如行脚空雲無定因一朝八百里梵誦五千人
草綠島根雪蓮開洋裏春吳門今夜宿離夢已無塵

東合三月二日看梅吳家園

入春惟雨雪早已負花期欲折且三顧未開無幾枝
正當山僻處將近月生時清影同予照冰漸泮綠池

送王純甫還朝

相送復相送滿城風雨聲開船是今日啼鳥報新晴
水綠草無色月香花有情江南春幾許半與使君行

答徐興公閩中見寄

索居轉與懶相親或得經年不見人
鳥散日高清樾下草芳天遠綠愁新
書通海國三千里語共山房一半塵
香絮滿衫頭自白可堪重問酒胡春

懷宋比玉

凍合青溪路君來我出城何曾一邂逅
同是雪中行意況自然冷鬢年誰不驚
相思又三月花落始春晴

夜泊松江聞笛

海氣生春濕江鄉受月寬幾行新柳樹
一帶落潮灘客夜頻移枕誰家尚倚闌
北風來萬里通作叫雲寒

哭陳元凱先生

誰得擬前身酒香頭上巾一丘還一壑
長病亦長貧別處思芳杜交情重野人
傷心聞計日五馬正駢駢初夏登君山
山在江陰城外爲春申君葬處

地傾雲湧出樓臺海色陰陰潤一坏
故國江山向誰是楚天愁思爲君來
纔烘子鱗櫻桃賣正語鷓鴣芍

藥開懷古莫論兒女事及時珍重夕陽杯

靈谷寺松下別聖僕卽都

萬松團一色堪把亦堪餐游日盡生碧客衣常不乾
霽淹春暮雨響作午時寒於此以爲別君知予所難

龍潭道中值雨

因過曾飯處轉憶向時晴水石迎人立風帆竝馬行
江喧赤岸盡村遠古榆平一路淋漓去看山且聽鶯

哭東生伯傳

寒盡吳門夜年開白下旬後先同一信生死更何人
有骨存香俠無家置老貧彌天芳草色淚處不曾春

野樓爲寇尊生題

高情不可寄於野結重屋四顧何荒荒千里但一目
斜光蕩平楚寒響叫枯竹日晚戒垂簾孤雲方投宿

明生攜金陵姬歸湖上七夕發舟

天孫渡河君渡江人間天上一雙雙遠山畫出學新
黛船隱芙蓉開小窓歸到五湖仙亦羨雲水重重誰

得見得見應須明月來月明人在百花臺

天然等慈師訪山中不值

飄散已如雨忽來成獨游蕭蕭水邊夜落落山中秋
以我不相值無人知惠休還將一笠去啼殺空林鳩

懷鍾伯敬先生

相期未可必相憶過秋中野水明殘照空烟響片鴻
游多因勝住官豈爲詩窮寄語長干柳留絲繫雪蓬

秋夜東睡翁

夜永秋入深落月挂巖背目注窓隙明心揉葉聲碎
滅燈復舉火解褐仍擁被履迹過成妄憂端集如蝟
安得好睡方來從睡翁睡

聞有從軍四十年歸者因以志感

劔立千峰外身當萬里行去時曾負氣歸日敢言生
家在侈天幸親埋懼土平年年戍婦哭曾見幾崩城
送張仲美之錢城兼寄丘無爲

九月起霜風客鳥滿南中就地卷殘碧延籬披淺紅

車枳亦復出飯蔬誰與同丘爲在徐泗相見慰秋窮

九日登吟壇

壇荒不欲上寓目百慨生况此季秋月風氣淒以清
山坳片雲坐天遠孤鴻征落葉不到地互觸自爲聲
當時徙一石百夫并力行當時鑿一壑千日未有成
先人棄此去亂草雜榛荆尚有舊根菊蕖蕪吐其英
聊取適時序濁醪相對傾

寄王元直

水氣作寒山出雲風林葉下日將曛此時憶別別三
載三載音塵隔烟海海客昨來湖上村說君草臥枕
松根廬中日月自昏曉黝然之鬢皤然老破涕相逢
定幾時恐予不識問君誰

得潘昭度新蔡書荅訊

故人宰一邑鳴琴事官守飛書致予問可繼牀頭酒
予亦問使君曾似春風否春風苦不閒吹花復吹柳
孫子長先生分推吳中喜賦

芙蓉結佩握分蘭象緯應先吳會間一路清塵秋擁
傳千艘明月夜開關飲甘惠水苻堪調吟落吳楓句
獨閒海內詞人天上使好將公事付寒山

寄勞維明

秋山宛新沐冷翠滴空水中有匿照翁短髮被長耳
園荒不復問任橘化爲枳善病販藥王松寮半傾圯
氣肅夜霜降泉響漸如始澗邊高閣上一日幾迴倚

入山

翳翳夕陽外疎疎黃葉中漫從生路去或有人烟通
短杖曳秋色酒衣褰野風童心自丘壑不覺已成翁

張孟孺爲伯傳扶觀歸葬靈巖感贈

纍纍惟此骨猶自帶窮愁野草烟生際陰燈水盡頭
行時莫算日歸處不堪秋媿爾交情古荒山見首丘

看菊睡翁家

秋老看花忙攜僧挈酒郎喜茲籬竹下猶有未經霜
淺淡新鵝色參差暮雁行燈移坐漸嬾杯照影能香

明發更何事幾人堪睡鄉此間云勝日不必是重陽
將曉

山深夜氣足鷄犬驕不鳴淡月流霜瓦東白互相生
所事又一日於眠猶半醒呼兒抱甕出早汲寒泉清

雨宿山寺

片雨屏羣動吾亦安所止于中豈無營及此一如洗
葉脫樹聲澗燈宿火光死殘僧有兩人供具足蔬水

聞王日常已還楚中却寄

將離曾復住相送幾無憑楚稅方徵橘吳歌罷采菱
此時通削牘前月去金陵累重攜家口程兼廢寢興
不知歸隱處可近虎溪僧

董明允過別齋頭山僧偶送菊至

過予聊一憇相對有荒園霜氣滿籬落石癭交樹根
幾從游處困難共別時言晚菊山僧遺偏當舉綠尊

隴上作

冷日慘不光亭亭下松檜野雲吹莫起沾濕兒女淚

是物悉有歸吾人亦無類今古何寥寥黃墟一都會
送李百可計偕北上

語別自生情何論賦已成三千里許路十二月邊行
雨雪春瓢耐關山暮燹驚去看新柳色如水玉堤平

明發

冬近夜彌遠千緒詎可一行李縮山雲早與雲俱出
陰晴決燈焰吉否占鷄骨慈母軫兒念戒慎拜跪揖
中嬾餉遠人煨芋濾米汁平居有所慕所慕非外物
如何舍此去徂歲且汲汲坐待東方熈穉子啓蓬蓽
峭寒乘間來霜飈正蕭瑟

楓橋夜泊懷趙凡夫

離况亦匆匆舟維雨正逢去家纔百里行旅入窮冬
江夜橋邊市山寒樹裏鐘伯鸞偕隱處春斷水煙重
聞滇南王中鳳先生見訪山中寄酬

官冷惟游稱情高所事閒來尋林下賞遍歷水西山
野泊同僧飯雲眠待我還題詩太湖石可似點蒼間

贈張子明先生

白來家郭外誰共老溪中把釣延漚月憑闌下海虹
寶光常覲佛玉貌已還童詩思蕭然得詩神象罔通
瓶花朝暎水簷草夜嘶風所立元無異於人未許同
子身全氣骨萬化等虛空祝噎辭鳩杖來朋啓雀籠
四公宜益五西瀼任移東

舟夜懷伯羽斗一君熙

野宿不問遠日力畏有窮榜人乘夜發牽月背孤鴻

路入水天際樹搖山影中所親應念念老至轉西東

立馬

立馬躊躇日已斜村中亦有賣漿家冰霜不入三人

市桃李新開十月花

石子澗

細竹離離古木疎石田淺淺水平鋪負暄老子橋邊

說此地從來夏日無

歇馬吟

至白門會郭二作

歌馬嘶翔雁伍淮水落日風淒淒入門見君如飢饑
君亦粲然爲色飛淪莽倒清江鑱蔬理中饋細語燈
前三十年幾夢懽歌幾愁醉不有年年別那得年年
會不記去年今日君送予蒜陵岡下觀音寺

陳幼謙別三十年一夕訪旅中恍然夢寐同聖

僕賦詩

踈牖斜窺月半規客衣新浣素香吹忽然而面對翻驚
骨未及心言且察眉多少寒暄成一別二三兄弟恰

相宜知君每出因山水水意山情在在詩

會等慈師明日又別

有傳師已物故
見益驚喜故云

傳言豈足恠成得會時奇師到我亦到所知猶未知
舊藿新稻飯湖上山中詩匆匆一歲暮窅窅孤雲期

寄姚珮卿

山雪未成雨江風將渡春無聊偏作客多故轉懷人
松下寒棋局杯中老葛巾歲除應懶賦妻子不嫌貧
投楊邦隆司馬

聞君騎馬向長干未顧尚書問舊懽風篠翠翻殘墨
醉雪山晴挂小窓寒仙同曷倩朝堪隱賦比相如姓
是官一面十年多少夢雨時花夜月明灘

憶遂園寄維節孔凡

烟霜拭高柳風影搖輕絲冰沼俯寒花晴光媚幽姿
高步石凌厲曲房雲蔽虧香繞挂么鳳塵流辟文犀
園中致足樂如何輕別爲微陽一以動百物皆含茲
日予匪稿木豈不榮情思

宋比玉過飲客舍待雪懷聖僕玉長昔游亦依

前韻

爾汝漫相值所懷猶恍然向時雲雪態今夜酒杯前
簫斷聲還怨眉新畫可憐年年爲情苦飄泊任花船

送王忘機赴南宮

片言卮酒卽成懽客舍如舟泊歲闌昨日梅花靈谷
寺幾時楊柳使君灘驛邊寄信雲垂暮馬上逢春雪
不寒前路正長無可念蜀山行過未曾難

過程孺文塘上居荅贈

門巷已西東蕭然只此翁重來廿載後無盡五言中
是日好天氣鄰家多洗紅半塘殘樹影如照隔江楓
寒夜同宋比玉崔郎蔣美人集肇禧隅園得書
字

欲雪亭宜客惟憐我到初及肩籬轉折寫意樹清疎
政美歸司酒情高出校書園西花照夜莫是宋郎居
臘月十五日同伯敬聖僕子丘茂之集虛野王

孫潭上山居

最得林中趣何曾隱立名路深來問水山半借爲城
蔬圃先春綠蘿窓待雪明一年今夜月微露轉多情

舟中立春

不是厭逢新防催未變鬢誰堪一年內消得兩迴春
在路物情異換舟鄉語親梅花曾夢見含凍待歸人

歲暮夜歸湖上

夜夢湖上有青山歲事相催客夜還帶雪花香吹冷

落隔溪燈影渡潺湲

元旦晚香亭卽事

人事不可盡昨日今日間新來一番雨生却許多閒
留客已深坐折花曾未還瓶中貯春水門外繞春山

聞何玉長度歲吳門卽往武昌

二首

知君守歲吳門舟念我見春淮水頭易地未能芳草
遍一番新碧兩邊愁

楚鄉風物勸登樓黃鶴樓前鸚鵡洲詞客傷心一杯

酒桃花時節醉江流

興福寺

山中有九寺九塢藏其一草色雨吹來松聲水流出
嘗新掘泥笋代餉剝枯栗春遠酒船渡常住唯古佛
早春獨坐對瓶中梅花

棲神靜默中嘘拂已春風門掩空香度瓶歌凍蓋融
自晨將及暮非恠亦無同山水雖予適何能外此宮

東凡夫

城中有屋與雲平爲買青山讓阿兄一斷世緣高臥
穩少年豪舉似三生
石作籬籬樹結翻家生春茵與秋萼偶遺書法呼兒
子未定詩篇詣孺人
亂山曾役五丁開滿地蓮花石上栽清磬一聲飛鳥
下問竒人去飯僧來
輪輟能存十八公清風無恙滿山中山霧報爾千年
物琥珀纍纍照地紅

荅寇尊生

雲出芒碭山水流冰雪間平居悅視聽卽事生幽閒
念我亦人外捐書因弟還遞遲行路日春邂逅江關
吳季明來游洞庭止于永福寺中見訪有贈

春山不易貌其變倏如烟到此爲初客因之得畫禪
時從雲氣出或聽水聲眠小圃無多遠花開值雨天
燈下對瓶中紅梅水仙

於時不後先賦性亦林泉豔凍愁春化香溫覺夜眠

一光勻寫照雙泛得稱仙以我能無忝安之恐未然
草坐寺園惜落梅

草去天將綠花來地作香承之惜綦履藉亦稱衣裳
僧話徧長晝人烟外短牆三春一已度游日定須忙

清明日雨與吳居士言別

花落未聞鶯春無且暮晴來朝又離別今日是清明
破屋埋松瀑平居老菜羹主人雖不飲別有醉予情

春泛漁灣同郭二

幽情忽自放問說是漁灣新水柳相得夕陽城作閑
遲方因曲曲轉亦帶山山網戶何曾見君家近此間

泛舟赤石磯同程孺文黃明立曾波臣洪仲韋
郭聖僕鄭虞臣黃允修黃飛卿劉師藩倪盧牟

韻用開字時三月廿六日也

春夏之間水石隈鶯鶯燕燕語相催船頭不遠孤霞
落城角才離片綠開生事借閒修會起野香無度逆
風來停杯若個能先步多看新鐫字幾迴

何介編
三十四
風來送鄭虞臣之北平

春謝雨中客愁多江上生柳絲衣帶水帆影馬嘶聲
記此會離日或予先後行一瓢燕市酒相挈弔荆卿

三月晦日送春郭居士家看波臣寫照

慧鳥隴山來學得吳人語客去每嚶嚶何不留春去
寫照以今日含情自容與雙髻百衲衣傍須美花女

登鷄鳴山

却從登歷盡得此渺無涯樹斷流餘綠天垂貼漲沙

人烟似寒食官舍卽漁家日暮鐘聲遠徘徊落寺花

送興和尚還支提

一杖一笠子到山千萬程不知天更遠似覺海無聲

筍籜就雲落榕陰如水清石林荒剝裏無恙古先生

題比玉霜林夜別圖

別意何蕭蕭風吹明月冷月照霜林中低回一雙影

喜林二茂之病起

平生二三友暮暮朝朝來見得新詩好因而幽抱開

茶香方替藥桐蔭已生苔小舫青溪上相將蕩幾回
再題節卿小幅

有無山色江邊路多少春情馬上郎記與故人前夜
別一天明月滿林霜

題費節卿馬上圖

惟乎竒哉邊風颯獵紙上起神駒蹀躞天閑開玉花
噴雪照郎面英雄氣色神仙胎橐中明月匣中水笑
指絕漠飛烟埃一如市駿行將築黃金臺又如椎秦
匿脫身大索來良工筆意妙若此使我瞥見無疑猜
麟有種龍有媒一日千里與萬里按圖莫問誰家子

新綠齋原序

廣平宋珏撰

震父有道之士也其文與行皆吾師而震父謙抑不
居但許余爲友余因得縱觀其詩凡已刻未刻震父
每出共商余亦時效狂瞽震父不恠也其詩自索解
獨往迄于今新綠凡七變每變輒自遠始猶哀梨入
口爽然回味今則天水天酒望之非人間氣色矣矧
飲食之耶始猶鳴球尚須憂擊今則風絃之自韻露
籟滿耳非十指所爲也大都歲月深而淘汰出性情

定而耳目空憂樂遷而感慨異筆墨靈而鬼神入卽
震父不知所至也人能定震父之所止乎嘗雨中集
客客分賦鼓吹詩無不手一篇沾沾喜及見震父作
又無不亟欲焚去者此旣一事矣然而震父不必敏
捷一字未安枯髯而哦至丙夜非如他人甫脫手便
快意故其思深其語化每變而自遠如此也夫震父
奉母洞庭游兩山者以識面爲幸歲一來白下輒寄
身闐闐喧填中牙籌肉簿交于左右而震父處斗大
一室席門繩牀名香亂書容入者如遇深谷如對古
人語坐不欲去此其胸中非大過人者烏能然耶世
思識震父而不得者讀其詩可以知震父矣嗟乎震
父有道之士其文與行皆吾師世或不盡知而知震
父者爭以詩乃猶有不盡知震父之詩者余於是乎
有感

新綠齋

震澤葛一龍震甫著

蒲陽宋 珏比玉校

登崑山

未到先見山到城山不見舍舟入城去城頭路如線
 路窮一突起丹碧半空嵌陽洞啓屈蟄陰巖走雷電
 海色連深松江流遶孤甸白雲結爲石石出璠璣賤
 訪友詩已未夏仲嚶城作

龔仲和

花村白如雨得君懷我詩
秧水綠生浪是我訪君時
計程三兩日爲約一再期
出門慙若此遠別奈何之

唐叔達

所思東海上寓目未有涯
偶爾乘潮去偏當君在家
衡門一尺雨冷爨幾朝
霞春事尋常度人人誦落花

婁子柔

望見駟馬橋到惟乘夜潮
神情始一接聲氣久相邀
海曲應堪老城居不礙
樵綠香飛醉墨殘雨在芭蕉

徐女廉

山船繫淺水起步獨委蛇
逐路問幽隱到門猶未知
潮落潮生處兼晴兼雨時
定交因阿弟其實乃吾師

李長蘅

湖上幾停棹尋君之六浮
還聞北平去曾宿宋家樓
今當梅子落雨氣生高秋
相逢知病好早已不勝裘

汪無際



原件破损

過橋穿小巷見說此移家物覺先爲瑞梅開四月花
我來將暮矣君亦遠歸耶可記湖中別雙帆背影斜

曹忍生

載客載名花花船白鼻駟按圖搜古迹枉路過貧家
坐卽就頑石飲無嫌舊茶別來凡幾夏重會海之涯

咬臍催妝

小姬六歲齊肩戲道先來不論年鸚鵡從中分解
說去年生日我同船

粧靚奚堪照影斜曲房西面搭棚遮牽枝帶葉無情
緒只問曾開荳蔻花

不穿茉莉當花釵不着長裙沒鳳鞋日課乍完翻曆
看明朝五月是清齋

聽詩朗朗復低低嬌怯新鶯羽未齊雙髻半欹持一
酌醉來濡墨借爲題

茅止生招同諸子雨中夜泛秦淮作

四月淮水大吳船半南國長公始邀宴自此罔虛日

日暮雨如綆千燈雨中出上下交一光烘燎夜不濕
樓榭亦縹緲竹肉相緩急葵榴發晝艷梅麥應秋律
掉艦傍高柳柳以酒爲汁

出都門十餘里望鍾山寄酬葉肇禧

小閣水邊起山在簷之端和雲躍靈氣入夏生高寒
常將獨客往不問主人看今復遠相送似君爲別難
投詩贈汨羅

忠憤塞天地不以日月磨年年此端五在在皆汨羅
精靈默相感蕩彼清淮波飲者各自飲歌者各自歌
歌飲既不廢懽樂亦已多投枕向冥漠悲來如奈何

雨夜仲和宅喜會諸子

秉燭照清冷莫知爲夏間風雨止不止主賓閒更閒
瀑響簷外樹雲生堂上山半生心向者今識好容顏
酌忍生齋中夜雨復作

比隣啓清燕分日會斯文昨夜夜將徹厭厭猶對君
酒白髮堪照語香蘭復薰留懽不獨雨門湧水如雲

新編齊
同實甫弟雨集長蘅檀園時長公在坐

海雨到先客客止雨未止漸看園沼平已浸石齒齒
幽花濕更香老樹枯不死所居卽空山所味亦如水
團坐無他人兄弟與父子

繡鞋

絲絲線線簇鴛文半捻難量寸幾分筍苗未成先解
籜花香生就不須薰曾經洛水渾無影若過湘山只
見雲肯許着杯相勸飲敢言一石始爲醺

坐凡夫山南竹林留題

林中千百人可坐竟日不曾逢一人我與此君先借
此却於三伏卧三旬

吳楓別有引

予與端卿雨泛婁江同起居者半月還至吳楓置
酒高會會予將之北平是日新霽夕陽在山江水
登岸慷慨悲歌一飲通夕別之時俱不知也行三
四十里始聞鷄聲喔喔從柔櫓間出枕上作詩豈

新編
非醉人夢語

半月牀頭共雨聲一尊留意與新晴斜陽入寺寒山
對野水通江遠岸平珍重故人憐小草幾多幽緒亂
長蘅也知欲別難爲語夢裏開船未五更

露坐

庭虛受天廣人間接物幽細花落香素叢樹生先秋
晏然舒四體脫矣如重裘展簟待明月墻陰螢暗流
東客避暑翠峰

松陰一寺掃風藤澗瀑飛來點點冰懶掛寸絲三夏
卧尚嫌諸有不如僧

寄李茂承

一隔二十載五湖三泖間會于別後見幾處意中山
舊客似秋落同官誰早閒蕁風起涼思小謝寄書還
六觀師禪栖高峰寺聞予遠行出山來會

入山山不了斷處復生路路若天末來人從谷中墮
叢叢竹樹黑小閣半窓露出則雲同出臥與佛俱卧

六時擊木響三載散花課知予將遠別竟日相對坐
道氣銷妄心靈光照沈痼

寄譚友夏

君到白門予到山相去四五日之間若教人事兩俱
奏恐以作合爲等閒秋風涼涼葉上起客心夜夜湘
江水山中人今將復來莫似從前嘆行矣

湖上別萬大兄

自小與君老無同無不同忽生萬里別只在菰蘆中
慚影背空水引愁當緒風前期那可說從此仰高鴻
舟中聯句同朱大朱季周六

龍女祠荒桐樹花徐侯山帶夕陽沙兩船各載離愁
去一望天涯一望家

哭金伯子

昨夜秋風生吹折青桐枝所栖驚散去啼殺覆巢兒
七夕鄒舜五招同諸子飲餞湖中

年年瓜果宴喧喧兒女樓今夕緣何事所親同一舟

烟荒澤國水露洗明河秋欲話人間別恐生天上愁
獨飲紫薇花下明日出山

行人日日見花愁首夏看看及仲秋明發秋風今夜
月酒杯扶影上離舟

題美人畫蘭送節卿

飄飄欲輕舉仙仙欲爲語翠袖掩秋風紅心啼暮雨
誰將淡墨寄濃愁知是秦淮送郎女

李孔凡過訪遇之橋上

長虹吸青溪返景攝秋雨曳履方悠悠逢君下車語
八月十八夜雨中林茂之過宿同賦

無能共君處幾負好明月一路往來心翻向雨中合
雨氣壓燈燈惜光移燈數數近胡牀晴陰自不關人
事試問從前何夜良

秋雨多

秋雨多一日二日三日過九日十日轉滂沱田家盡
說耳生禾哭之不得聊且歌歌以問天天若何秋雨

多或收烽燧洗兵戈

秋晦日鳳凰臺作

路改已無憑行行導一僧荒秋悲老樹崩土戀垂藤
重九日不遠二十年再登陰雲滿城內江照返鍾陵
九日雨花臺飲會時予方止北行劍自不關人
杖策提壺誰不然年年今日又今年一番陰霽成高
會滿地笙歌若聚船江面細開南鴈路堞雲寒翳北
風天出門倘卽從于邁愁背芣花何處眠

隔雨聽鼓吹

林堂喧客醉無語鼓聲吹聲霎時舉闐闐相得不相
奪只隔簷前一重雨雨初織絲復縻縵織成未成障
秋冷忽然有若揭而入雨聲翻受鼓吹領聽則孰疎
將孰親所見惟雨無其隣水木從中合振激一籟難
分天與人人不外天天作喜有聲妙在無聲裏此意
應先得之耳鼓吹來時耳應洗

九月十日贈俞仲茅司馬

昨日黃花今日看野瓢山供就君懽童時爾汝還如
此世上雲泥不隔離恩許家林敦所好秋將風物勸
加餐年年勝事登高後久雨乍晴天不寒

重陽後二日爲沈雨若生日同比玉過訪柳花
店夜醉聽歌明發移居天界因寄此詩

秋客亦常醉醉於君君在歲開陽節後月在水窓南
顧飲忘爭雉因聲訝吐蠶來朝携菊往應只傍松龕

白日掩荆扉爲鄒滿字賦

花衙過午蜂猶鬧花壘生香燕始歸而以性情能自
簡不緣人我故相違鉗穿破壁沾隣酒竿揭中庭晒
浣衣客有新詩似君畫題將白日掩荆扉

贈鍾太公

正值菊花天初開松栢年五雲曾謝誥千里獨携瓊
太伯城中館梁鴻溪上船往來二三子分日送山泉

答咬臍對月見懷

一方空水不生烟秋滿中庭月半天對影懷人惺亦

新編齊
夢澤湖應在白門邊

林叔鳳送弟叔辨就婚比玉與予偕行丹陽道
中兩日不通姓字及會於比玉始爲之奇今叔
鳳先歸贈送以語

兩日肩輿路參差到白門默然心共許曾未與之言
炬列夜堂晝馬嘶秋客喧從中一握手酒後復開園
顧此菊花影奈他霜月痕難兄寧獨紀快婿亦如髡
遽爾先歸志應將慰所尊經一迴吾故里好問水雲村

答雨若萬松菴見寄

入寺深復山山風松樹間移情於視聽享病以高閒
數客豈不厭與僧同掩關還聞前夜酒送月野塘灣

秦淮圖

秦淮渡口王家妾一去千秋名不歇春風遍滿綠楊
枝寒雨離披紅樹葉波間樓榭影娥娥半揭花簾顧
盼多來往游人自朝暮前船歌接後船歌

題比玉畫送別

遠舟將發柳絲牽五兩風吹綠半天指點壚頭送君
處當時曾醉李青蓮

年年潭上春水波年年潭上桃花歌歌聲不逐水流
去送到情人情幾多

大寒天氣半烟山亭子空空樹樹閒不是無人堪入
畫最傷情是別離間

春魂秋色淡烟粧南國佳人似海棠萬水千山送君
去別時先斷憶時腸

秋杪看菊虛野王孫山園

時聖傑
杖先至

最憐朱邸有蓬門一歲精神菊數根俠骨俠腸幽冶
色寒香寒影艷陽魂許誰載酒花奴解放客開簾杖
者尊已得分頭彌日看再邀還乞主人言

范漫翁畫山水歌

我家七十二峰起耳目親記惟山水山兮水分於我
兮一日何曾爾爲爾自爲草草山山悞漁服樵巾踏
塵路今見老迂山水圖久客天涯故人遇人言此老

前十年笑言咳唾皆雲烟十年以後得畫禪鞭撻虎
頭奴鄭虔大幅小幅用力全如獅捉象捉兔然千緡
片紙不肯購樂贈何嘗論一錢贈我過于贈家口寒
山寂寂松雲走石根漱出百花澗茅屋半間安獨叟
問叟是誰多得閒山其彷彿五湖間願操艇子輕如
葉暮暮朝朝往復還

憶聖僕齋頭鸚鵡

綠禽靈慧得人情我復來頻識姓名幾度恐煩留絮
絮趁他幽夢熟時行

游賈氏園林同比玉肇禧諸子蔣美人

園開秋色滿城斑細路荒荒亂篠間雨洗石根來處
遠煙空潭影照人間高天忽落冬青子小憩爭偎萼
綠鬢蔭閣草亭應特勝醉予還有夕陽山

寒夜雨若水上閣偶成七韻

倘或非三徙何由得似歸閣虛無不茹夜好肯相違
臥柳全然影枯荷未了衣烟能生月夢地恍受天飛

新編齊
四顧一於寂此間聲亦稀茫茫者寒水泛泛乃荒磯
我欲爲漁老唯君是所依

瞻巖閣爲黃飛卿賦

特立而巋然君家有此閣閣中得所瞻非岫復非壑
名之以爲巖巖亦非真有卽在恍忽間瞻之或前後
天氣一氤氳有如巖出雲風聲乍浙瀝有如巖泉出
巖月下閣西巖日生閣東悠悠瞻顧心日月不可窮
黃伯元爲予寫照贈之

看君寫影子一筆亦千古攬鏡以相印覺我非真我
真我真於一胡爲有其對蘭心在谷喜麋性入市畏
其中自坦坦所履無艱艱不必益三毛勉唯承一間
客夜雨窓聞雁

醉薄坐能醒窓寒紙破櫺數聲羣斷鴈半夜雨中聽
去去若相念勞勞殊未寧客愁難寄汝自照一燈青
哭王亦房

君見湖上山卽棄城東宅卜居雖未成心鏤石公石

酒香歌艷中與君一把臂豈知千歲期五日虎丘寺
人間無肉骨地下有名根逢君先子問別創一家言
豈惟予弗信君亦信之乎既死不復作斯人斯世無
雪夜懷孔先生

去年無雪一冬暖山中十月梅花滿先生拄杖我負
瓢細踏煙香入雲遠客心搖曳似江帆欲趁北風風
又南今夜梅花去年夢小窓寒對雪瓊瓊

寒

朝寒不能起夜寒不能睡苦憶湖上山幾點雪中翠

寄十郎

山客匆匆發不及寄書問書中亦無他只問梅花信
聞汝兩三月不到我園亭應念蒲柳姿怕見冬葉青
舟中紙榻和顧孝直

雲層層一疊水坦坦俱平寢與雲水上爾汝楮先生
以紙承衾枕孤舟旅夢溫別時留影子知是虎頭孫

懷朱國蔚

念唯兄翁在獨處不言孤一自遠書遠各愁無日無
江分衣左右歲換立須臾倘亦聞歸計霜邊橘數株
寄王元直

一方應萬水多壘復驚魂知爾能無事在家惟杜門
白如霜雪酒紅是荔枝園待守山中歲思之語尚溫
戲題小書示盧牟

竹石枯枯墨不濃菊花蘭葉共秋風問他名姓千年
後譜上曾無此畫工

聞聖胎將還南中喜寄

歲歲怨蘼蕪蘼蕪今復枯聞君出燕薊送客有屠酤
寒減應南服書迎或半途殷勤灑掃處曾爲我留無

曉步城南諸山

久作城中客見山如見家况頻過寺冷亦漫入林斜
風葉翻春燕霜苔繡曉花最竒高頂上步步有紅沙

題畫蘭送石生師歸香谷

言師香谷去贈以谷中香墨露夜深滴寫經明月房

新編齊
長至日沈雨若社集郭聖僕宋比玉譚友夏葉
肇禧汪闇夫諸子王慧生寇貞秀蔣子芳三麗
人送友夏還楚予還吳中
同用飛字

客逢長至偏憐夜別有佳人尚可依香豔幾多生願
盼荒寒一片隔簾衣酒如春雪歌邊照火作朝花水
上飛情滿湖山分不得兩鄉俱指洞庭歸

冬夜期聖僕比玉雨若友夏肇禧集渤海王孫
溪園同用溪字

幽花香步晚東西冷葉枝枝落未齊更轉籬陰罨戶
啓半沈山霧女墻低水歸月入能爲漲雲東風吹不
出溪渡酒短舟何處纜小姑祠畔柳生稊

夜酌沈君禹城南山居

熒熒塔中火照見幽人適客坐席已暖酒催傳不訛
一年年乃爾今夜夜如何居然方以外只是曉鐘多
欲歸翻旅遊爲友夏賦同用明字

出門無久暫到日乃歸程似鴈春南度如帆風轉行

怕談今歲暮，彌重故交情。勝處記不記，家書更不更。
夢塵花瀑洗，酒夜雪天明。倦色看童僕，愆期悞送迎。
試歌湖上曲，可是越中聲。

送鄭幼達還莆陽

我游君未到，今復送君還。鄉路三千外，殘冬一月間。
何處見春草，與誰行夜山。豈無冰雨雪，慙霽別時顏。
宜懿冲劉師，藩將別同聖。僕夜話齋頭，因懷幼

謙元直

欲寒先作暖，風雨在其中。已是渡江客，爲予維夜篷。
談親燭不剪，飲快杯如空。有美各鄉縣，去留相念同。

肇禧邀同比玉公武伯繩彥仁與美人郝清一

蔣子芳看雪結霞閣得風字

飄忽亂烟空，無風似有風。遠歸高閣上，情起大寒中。
曲按棋偷響，杯飛袖引紅。也知天女散花不，藉春工。

題秋棠代贈

嬌難分面誰能畫，弱不勝秋豈耐寒。今日驟寒應懶

起帶醜和病待郎看
憶他幽意與幽姿強把秋花寫一枝總是未能相彷彿斷腸呵凍染毫時

聽雪齋爲張隆父作

輝輝似有托簌簌未有窮寒林無花葉飄颻今夜風未敢啓窓看自覺天生聰應須記此響消炎三伏中
嚴延甫之楚復留秦淮數日別難爲情送以情

曲

不合君來先喚船黃頭十日坐江邊怕他聒噪聽歌耳私自頻頻與酒錢

雪裏看花花裏眠莫愁飛雪到新年愁人只有湘山路漫入寒蘆苦竹烟

雪後登城懷山中親舊

一城無內外羣動若相安絮柳江南盡金莖天上看井烟浮疊浪僧路投長干目去神難攝晴來塑不完鴈過低附影雲活漸生端久客非初念窮冬各自寒

處去詩同比玉和貞秀遙寄友夏于竟陵

客船何處宿宿向猿啼處啼莫待三聲便可開船去
城中三日雪失却分岐處恨雪不前來遲郎三日去
傳言郎復返密覘居停處夜寒空閉門月照江流去
衆中歌向郎寂若無人處一聲牽一絲風吹不能去
幽房只半間他人無坐處惟待有情人情來與情去
一段筆墨緣生長無聊處願取海棠花分些薊澤去
幾疊楚山雲攔却魂飛處一帶江水波盈盈眼中去
畫得幽蘭花吹香非一處勿恠花無心心在筆先去

旅聲原序

公安袁祈年撰

予之都門於衆人中得一客美髯長指爪苦吟有一
字肖唐輒輦蹙或經宵不眠期得當然後已都門之
爲詩者必質於客客言佳始定否則他人稱其佳受
之者不快予曾與譚梁生于司直及吾鄉譚友夏走
碧雲窮水源泉濺衣裾各踞石而坐聽爽籟恨客未
偕選一石取酒卮列其上謔獻語默若客在焉遊侶
雖四人類五人也客所著成帙行於世者甚多新所

著有旅聲近數百首刪就約如雪經解雖消未損如
絲經練雖小未減大率不屑與羣言為伍不屑與時
賢之浮談相敵不屑與汗牛充棟者相頡頏獨往獨
來自出手眼所謂真龍一滴之水與溝澮谿澗者不
同予何人也乃獲與客作延津之合此亦北來第一
因緣矣客姓葛名一龍字震甫姑蘇人

旅聲

震澤葛一龍震甫著

寒河譚元春友夏選

勞勞亭故址留別

金陵送客處遠過水西橋亭廢名猶苦岐分鬢已凋
細吹風若語枯立樹無聊不及從容顧江船趁一潮

宿浦口酬過江一二友人

行者昏昏去應如寐與酣城新知浦口月出是江南

別詎忍同衆情難爲再三滁陽亭上酌留以待歸騖
過梁溪不及訪鄒彥吉先生因寄

順帆輕楫渡斜日遠烟村數里坐超忽片言難具論
人儀此瞻仰吾道有司存上坐衣鶉結中林攪馬喧
聲歌發金石經濟托丘園一刺懷將敞孤峰望益尊
堞雲空戀戀溪水落霜痕

新豐曉行

土屋暖堪睡主人燈在門爰循疲馬路漸入遠鷄村
山瘠乘霜氣溝深凍月痕隔疆兵燹地一邑幾家存

謁閔子祠

廣路列豐碑高墳貌古祠塵邊下馬客枝上哺烏兒
必汶辭他復同顏發聖思三千年以後孝治有餘師
徐州寇退喜會諸弟姪

弟姪客邊親生存亂後身寄書通不報覲面始爲真
卧起燈三滅悲懽酒數巡故園同此念長至乃明晨

河上與弟實甫

萬里湯湯天盡頭幾年衣帶古徐州無風忽自起神
澗欲渡應先溯逆流險阻氛祲當十面功成保障說
諸侯弟兄徒倚蘇堤日歌笑重聞燕子樓

發彭門寄寇尊生

到卽問樓居猶在百里外我車逼歲暮僕夫急征邁
旣爲小草出行止自無奈十年空寄書一日不相待
西望砮礪山雲氣結成蓋

山谷沛上宵征

路長寒日短晝夜著征衫霜地平於水風樓列似帆
循聲向雞犬宜土少松杉一度鴻溝月高皇舊里閭

濟寧公館喜會俞大光祿

語及多竒喜復嗟路偏晴不動塵沙坐呼着膝娛千
里拜起焚香看五花酒畔霜移近牀月簾前雲散隔
林鴉難忘帶醉題書別北道郵亭濟水涯

微雪

微雪飄能遠關山度幾何塵中看不辨陰處覺存多

若爲江南客奚堪沛上歌居人云乍見冬至一旬過
臘八日鄭州雪後懷郭聖僕

白沙如雪雪封沙步步思君樹樹花夜半塔薰清曉
粥與誰同在朗公家

盧溝月夜柬聖胎

十年離夢隔盧溝溝水年年入夢流今夜踏霜橋上
過月明還照兩邊愁

禮梅檀像

未禮心心見光容等一慈住持從得地遷次已知疲
照月乃初鏡飾金非故緇學人誰可語孔李亦同時

都門除夜

豈惟冬盡夜已覺路通天蒿酒苦不厭雪燈寒亦然
爲親寬自老同客讓他眠長樂鐘聲遠因愁聽獨先

出都逢立春

出門行李似歸人誰道歸期未卽真馬上客愁愁計
日一年爲客兩逢春

春夜再飲生共

春酒融春雪春歌復夜徵坐中誰不飲飲外我無能
風入聞嘶馬月來催上燈影移花傍客相顧若爲矜
正月十六夜同法幢訪蘊璞師於金剛寺

禪燈一晝夜夜續上元春花外無明種光中不壞身
居然般若地原是石頭人塵夢年年異今看面目真

我書齋與李聖度會別

近遠客初年相遭卽是緣春風生馬上春雪照花前

氣異居難似情多用得專今宵忽語別况乃落燈筵
寄曹元巽

行行湖上別忽忽酒間夢旣別復致語惟恐世爲用
東風二月吹桑乾未開凍憶曾期此時君歸我來送
詎意身許人何由得輕動倘躡廬山巔遠寄雲一甕
夜過陸晉侯新居

固是緣隣徙菴居適對門不知誰遠客先共此黃昏
眉月生簾綵情歌役酒魂春雖無一半花事也須論

二月十二日重過愚公

斜景蕩陰翳餘寒生寂寥曾同過月夜今復對花朝
石上雲松立籬根雪菜挑懶因成禁足送客到門遙

京兆王公招同張法幢侯若木

客能來不次坐亦許頻更一日飲相對五湖心復生
春山着色遠鳴鳥悅枝榮門外天星亂行燈滿帝城
倪不滴至

門前忽下馬猶未信君來對面轉無語得書翻怕開
草芳初客遠月上獨行催母老應同我離腸日幾迴
郭聖胎佛骨齋梅花

梅花今日見不是故園春一舍爲香國孤雲結化身
晨昏應得所清冷更無鄰以我頻頻過何曾厭酒人
春日張林宗寺寓賦得天欲今朝雨

翳翳四雲上冥冥一氣勻滋芳應有待消凍得無因
草色天邊路杯香寺裡春晴陰卽時事莫悞看花人
夜看侯太史瓶中桃花

絲雨坐來歇折枝舒小紅水神扶豔夜春面受微風
酒對光相暈燈移影不同可勝烟裊裊復那月濛濛

清明日高梁橋看新柳

喧喧出塵路春向郭西尋千樹舞千態一絲牽一心
帶黃初照日雖綠未成陰小酌聊相命風光醉客深

任丘孫茂先訪予病次贈送四絕

鬚虬面玉氣翩翩供奉才情洗馬年已中千人萬人
選如何只欠一人緣

出外經年病一身不知吹過柳花春條從枕上傳名
姓四五年前夢見人

談時已勝韓康藥坐處還留荀令香風雨驟來燈燭
換爲君今夕下匡牀

客中送客自生憐二麥青青四月天握手算歸同一
路君程三百我三千

都門病後送吳于達赴曲周

龍城路繞五雲通駿市塵喧十丈紅我居數月病三

旅聲
據旅命如絲繫千慮得若臥次予未知花好江南春
雨時自此過從無閒日子草從君懷袖出信乎有道
交不同死生可托傾蓋中三朝詩藥隱金馬美業不
在師保下如何垂老只一貧蕭然八口出疆晨國門
冠蓋爭攀縮香絮狂吹愁思滿

瓶花

折應煩素手來許帶初烟一見如相語頻移得近眠
景光春可駐夜色曉猶憐香蝶依依處誰知是客邊

寄林宗

客到燕山盡一年六年前夢此依然也知行路分南
北相見如期不後先夜放雪蹄城浸月春眠花寺酒
搖天小郎未語能娛膝學得鷄鳴向客傳

雨

昨雨夜聲急枕上初不知夢回芳草路將及到家時

窓月

非不愛良夜夜良轉淒惻虛窓面廣除片月掛如璧

明明入孤懷淡淡守東白何時約歸裝爲我照驅策
懷六觀

少壯任馳驚每結山中鄰垂老信空寂且爲行路人
蓼蟲不知甘冰虫不知暑驚颺颯秋魂把誦別時語
寄凝甫

衣緇與衣素同是出山伴燕山五月雪歸鴻一聲斷
聞君壽阿母爲母留僧飯感念勞心神相揆獨慚汗

樾館貽吳仲晦

別館在山縣旅居仍借名題如蕭字古老甚越吟情
日月資盤礴肝腸擲友生醉歸常得晏朝騎許同行

西山

西山只隔此城墻日日惟看駐夕陽却笑在家游以
臥今來爲客懶如忙烟萋路草天涯綠風擊林花雪
片香得到定然歸不遠好持明月問支郎

送李元鎮祠部冊封楚藩

冲聖敦嫺睦分圭出九閭王程開碣石天派遶荆門

湖泊樓前俯崇當嶽外尊風烟勞駐節木石解承
恩晉接皆隆準披揚足大言樂張魚鳥避襟擴水雲
吞望氣猶龍至還朝錫馬蕃躊躇爲此別難臥使君
軒

六月十六日再與于達酌別

久客望歸路遙遙天外雲故人將別語耿耿病中聞
斟酌杯雙進虧盈月一分平生重恩怨不負灌將軍

林屋洞中送客六月廿五夜夢作

宛爾在深巷不知天地空石響滴爲雨草光搖若風
秘却此中語信於何處通殷勤送君去一路桃花紅

御苑牡丹次葉少師

開依日月寵光新自有微風蕩綺塵不敢舉頭非是
禁似難程品獨當宸循臺艷炙層層玉迓輦香先步
步茵 聖主澹無妖冶好賞同魚藻樂惟真

西方庵訪潘寒汀

亦知非郭外所處自幽遐屋角提青蔓庭心樹紫茄

更裘卽御葛握髮便籠紗細語予歸日經過一問家
七夕同周虞卿雨飲姜神超因寄法幢城外

客心忘節序語及自然驚點滴燈前雨有無機上聲
秋能深夜坐天亦近人情倚醉遙相望星河隔一城

種松詩爲聖胎賦

移得孤松帶石苓雨中辛苦役山丁千頭直上細烟
霧一臂欲拿深戶庭擁書不眠夜聽肅把酒仰看秋
眉青今君有此復何慕木榻惟堪置管寧

秋夜同武仲宿呂公堂

草木自烟翳居廛半水周帝城偏一角仙路入高秋
月晒地霜起風翻天漢流如期同襍被清極夢難游
乘月過聖胎看竹

明月忽又滿不眠眠復驚出門無十步看竹已三更
寒墮水雲碧秋搖風露清主人亦斲寓灑灑客中情

善果寺訪法幢

出城三里樹陰陰及到林中路轉深半啓白雲僧識

面乍飛黃葉客驚心
酣餘似可憑秋薜約再應須抱
夕衾不雨不晴閑一日幾分齋飯下幽禽

林宗許飲松下不至寄之

未醉與將別諾言無異同
彭亨携樹底欵段出城東
高陰落秋翠斜光銷夕紅
坐寒衣謾謾惆悵寄松風
將別吳文中作相逢行贈之

北風蕭蕭雪滿驢
尋君官舍城東隅
見予驚詫別許
又面何老皺斑髭
鬚予謂勿驚且爲悅
所遇從前爲

予說先帝知名未召見
中官攀賜歲除榼是時聖
穆省朝儀特許天顏一見之
芒屨山衣御前脫恩波
沐浴鳳凰池傳宣供奉無朝夜
篋中睿札龍光射侍
班稱嘆宰輔竒先後之吳有江夏
忽成軒鼎湖深
墮地攀髯慟不禁
冲齡嗣聖稱大孝簡在彌加

先帝心金滕幽秘千秋積
鉄袞其間備實錄錄成一
代誰得觀落盡眉毛筆花禿
還聞坊表表先人有子
桓桓扞衛臣孝義一門天
語載肖貌五岳坤靈神記

曾夙昔相期許何如蔡澤逢唐舉彈指彈冠十五年
今復高歌歌爾汝

秋懷

一輩稱先達滄洲挾布衣獨慚將暮景匍匐昧知希
風雨自朝夕邊疆多是非出門鄉路在日日看人歸

送李果卿宰龍南

楚越一琴孤山川不盡途停舟傍月石鳴鴈出霜蘆
文采行中秘神明子大夫經過彭澤里秋色未曾枯

六月七日石燈菴

今日猶爲客惟僧香火親低頭雙眼淚失怙十年人
九月十四夜看月道上人菴

白月臨初地空涵一水寒圓時先隔夜近處卽長安
蓼影牽風弱茶烟觸露溥棲棲者誰子亦共懶僧看

送劉念徵還吳

上書非得已天語幸相欽別我當萸節還家有竹沐
西風吹葉脆南鴈入雲深去住難爲夢關山夜夜砧

送王大中丞出鎮山東

菊蕊初黃梨葉丹上公專鎮擁桓桓九重推轂天威
寄一鉞當秋日氣寒自有清新開府句人將依倚太
山看陽春利用凋殘後小隊從容訪杏壇共酬
寄劉虛受兼訊王先民閔百先
山園好風景爲別兩年懷閣樹探巢穀筵花掛舞釵
星多池上落照可飲中埋自不離蓬戶何曾廢草鞋
羊求非速客鷄黍間清齋信托孤雲寄愁難一日排

欲知予病骨衣表見如柴

送張文弱署教象山

邑館孤臨海山溪細入烟門開通駿市郭負有蚶田
家口携初臘旌心曳遠天春風隨意滿吹在百花前
佛骨齋爲聖胎兄賦

是佛原非骨因齋得此名諸空能萬卷一日可三生
立地雲初起離山雪未晴酒徒爲護法念子當垂瓔
壁素延花照窓紗格樹聲以予頻過宿虛榻傍長明

送許巖長還莆

萬里擔簦客各尋僧舍居幾番期爲我曾不顧尚書
及此歲時暮行將冰雪俱仙人家鯉溘因托夢何如
送陳季琳叅岳豫章

國門傾蓋卽傾壺官全渾如一事無奈此別時聞夕
鴈念予歸計負秋鱸烟雲屬部神仙吏風雨淋漓瀑
布圖公案好憑高閣了柳搖春浪綠平湖

次答林二茂之見懷兼呈俞大光祿

雪帆冰渡別經年秋燕春鴻信可憐病日苦多難屈
指畏途趨捷敢垂涎也知莊舄空吟楚却惟山公未
秉銓夜酒每同應念我梅花亭下月明前

雪中答蔡以寧

北風淒緊凍花飛寂掩松寮客到稀家在兩山同一
望不知寒盡可能歸

贈張侯

張侯骨奇髮怒指七尺磊砢出九死血戰蠻雲瘴烟

紫銜枚鶴唳風聲起上將論功不私已姓名得報
聖天子會如隔世添悲喜少年舊事歸統綺

雪夜喜華孟宣折梅花一枝過訪

荒除雪欲滿旅况亦孤危愛有江南信憑將馬上遺
冒寒開酒夜如夢到家時響落簷冰碎神流燭照移
也知當病起猶恐借春爲破屋先生老孤山處士誰
飄零歲復晚得見轉興思

除夕雙河菴

旅人相對夜眉色動年梢酒滿天爲壽爐寒火再交
早花歸禁籞生菜理春庖莫放鄉心渡船冰一路膠
夜看佛骨齋梅花

昨歲花重發薄游人未還來因乘好月看卽在深山
淨攝燈生慧寒凝石共閒醉憑誰寫照烟水屋梁間
薛曾隣還毘陵徐伯傳還馬跡山

倦客厭芳草不知行路春春邊忽送別別乃是何人
一命西川下五湖東郭鄰相期應萬里珍重濟時身

俱泛湖中宅各分湖上崑
夢游驚一見心送越千帆
時事誰堪語山靈易受讒
路南春自煖烟綠洗輕衫
曹元甫衙齋夜飲聽歌

雪豔燈紅夜不成明朝還卜上元晴
花簾只透含香氣竹肉難分隔
面聲客以江南當一坐漏從天上落
三更九鷓杯浸盈盈綠銷盡春魂醉語生

李水部折紅梅見寄

情人易春感爲我剪輕紅
欲贈猶自把此心先已通
氣淑沍寒際豔滋枯淡中
旅燈孤照夜還許對司空

送虞興宗

旅爨幾朝虛如僧比屋居
歸期間行李心事出家書
春近百五日歲經三兩除
未能君送我鄉望是青徐

過黎無求不遇

曲巷行不了白扉相對斜
似先安客坐留且醉君茶
故紙盡奇字滿瓶皆野花
弟兄誰得問劇孟魯朱家

長安見新月

緩緩待黃昏低低可與言客邊愁易滿春上攬無痕
有美但西望將期猶北轅眉纖多見嫉莫度漢宮門
送楊修齡先生開府南贛
薊北新烟上柳條虔南晴雨散花朝月高烏府彤弓
蒲潮湧青城玉馬驕江派九分憑四履風聲一樹格
三苗還知不淺樓頭興禮接詞人是下僚
與孫茂先夜話因致劉戶部伯仲

去年風雨宿相憶每生寒此夜香燈坐因離不及
望中家是月書後藥爲餐待我春園酒憑君報二難
清明日報國寺松下送姜神超

奇攬不可狀此樹江南無何當折柳日來挂踏春壺
離色寒初地風聲響上都送君深坐語香翠滿衣濡
見歸鴈

噓噓自爲驚天荒草未生隔年秋萬里幾夜月三更
遠影塞雲盡片愁南雪輕故鄉書不寄只說離青城
送道上人還樵李因寄秋潭師

無日不相見夜還乘醉過漫然方外別其柰客中何
海路通詩遠邦畿施藥多寄言相念者黃葉下庭柯
蔡以寧游西山一月不歸寄訊

四月西山寺寺香酒邊行路竹間牀阿誰公子離家
早能主司空出郭忙嘶馬落花當曉瀑問禪枯樹立
斜陽舊鄰孤旅應堪念橫卷鄉心一片蒼

筑語原序

寒河譚元春撰

予友葛震父在都下日苦吟不意都下有此苦吟人
也題曰筑語而誦其詩則有曰悲歌今已矣歡笑且
從容其意似不欲爲筑嗚乎震父之意厚矣天涯久
住觸物悲思忠孝不暢心有斷續震父之所爲筑也
然震父幽緒古懷埋照於乞米典衣之中長安日月
有光鄉人消息不斷都中人士但覺其往來市上馬
頭塵厚卽僮僕亦以爲吾主人翁有所營於此而予

與震父交最深能知其不然也有營者所以度日久
住者所以忘情偶入山中嬾至州郡與偶過都門嬾
歸湖山皆詩人之息機任運似趨實舍而苦吟終日
以爲一快者也予故曰意似不欲爲筑使其意欲爲
筑也鈍如予亦得而和歌之矣

筑語

震澤葛一龍震甫著

種竹

澶淵王 憊種愛校

目塵何所見一草一木奇况乃數挺玉敢惜千緡爲
搜橐旣若洗欲貸將焉之得購亦云苦厚植忘我疲
新梢掠窓素眼光綠離離好雨西山來滋土如未移
因思太湖上百畝蕩風漪裸袒吸水臥不知今復誰

會陳振狂

烏石山中客荆卿市上逢悲歌今已矣懽笑且從容
病起見秋草酒醒聞夜鐘有兒能荷杖曾不媿荀龍

王子春南還不別

聞君歸念中夜起駟車曉度蘆溝水情親如我不及
說尋向空廬笑無鬼蔡郎亦是平生人遠去西山百
餘里每寄書來問子猷離聲應到松風耳

送吳聖初司馬鄜州

共此不盡意別時難具論中天分北斗六月向西秦

草疏懷將敵明王夢有神近秋無柳色君到蒲城春

送林仲長之任溫陵

郡從泉上立泉響訟聲閒愛我兄兼弟之官雲復山
主人二千石幕舍兩三間送送空勞結何時放白鷗
午日飲顧太史衙齋

不必論荆卿何須懷屈平盛遇樂明良舉世無獨清
坐見陣雲作殷其雷一聲醉客相顧語甘澍當如傾
物亢仰沾漑日佳忘晦晴珠重九節蒲餌之身可輕

送曹元甫觀察杭嚴

蓮葉西邊蓮葉東去分吳越路香通起居半是魚鳧
外勾當不離山水中西子湖平幾船月嚴陵臺挂一
絲風愴予未得從公邁六月燕天叫雪鴻

復公至

三十年前雨荒秋野寺深三千里外月燕市酒家尋
詩老惟存骨情空只問心還聞丞相閣能視遠公林
訪譚友夏于萬福寺

幾雨抑途半未秋多病端言尋亦不遠得到始知難
一寺野香寂六時幽意安樹光浮夕景如水照人寒
六月六夕袁田祖王子春張應君張龍生蔡以
寧小飲寓齋

晚客如歸到解衣花竹香輕颺飄露氣初月養秋光
未許雲山別都忘吳楚鄉情來惟有醉燕市卽高陽
送施沛然別駕廉州

路入炎雲萬里迂一行分刺海東隅郊勞鳧使爭投

爲氓隸鮫人莫問珠夜氣早能生赤日秋聲先不到
青梧而翁舊有甘棠在隔郡連陰兩世扶

見庭中紫薇心動同友夏作

吾家曾手植初亦如許長連月照書屋數間同一光
此花如久客一開開不了君來喜見花翻覺主人好

答吳元翰

道衣禪悅自由身味盡山中草木春此地忽驚來遠
訊對君猶未信伊人正聲一輩還存幾獨詣千秋不
借鄰疎雨送涼堪問酒共看山翠壓城闌

送王道遠署教崇德

相見各憐衣上塵耳中應老少年人一官再補無他
好桑梓陰連桃李春
聞說脂車復借舟潞河水滿急星郵凡過一驛須題
字可當此君風雨秋

張筵清夜幾招予曲奏琵琶掌弄珠偶出青城不曾
到今持一盞立須臾

杏園春早要來看今去匆匆別不難倘見念予游况
者謂能令藥貴長安

出東直門望昌平諸山寄以寧

幾年不見山幾日不見君今見此山問知君惟隔雲
雲濃山淡雨初歇山忽變雲雲變雪諸陵松栢怒秋
響可念城中飲冰熱

孤村

斷橋磧路水流沙沙上孤村一兩家門掩綠陰秋滿
地阿翁携幼掃槐花

檀城道中

雨氣散空磧忽來何處寒萬山盤九塞一臂托長安
隼過當秋擊驂停未午餐行邊有相國人不厭儒冠

白檀書院雙松下聞鄰笛

互影收奇戰分頭寫翠空向來戎馬地誰植此清風
濤枕歌三伏冰漿濯五中何須怨關月秋在隔牆東
再宿牛關山下

猶未歇鳴蟬幾炊青遠烟野荒行侶後鄉念主人邊
鱸晚才離罟瓶春偶到船廬居一甌脫五日兩回眠
次答周安期

有廬山水處所幸與君同相念各在外相逢猶熱中
家音言笑得秋感性靈通塵儿埋殘草烟窓冷細叢
茗泉香入淡花露碧成紅問我長安日壯來今已翁

張同覆移寓報國寺寄之

出郭多名刹因松此幽尋空秋結古秀日氣銷寒陰
雷神破壁走木客吹燈吟予病臥一月過從須抱衾

隣砧

旅人惟藉夢不甚到家難何必此聲苦急催今夜殘
隔鄰秋萬里當枕月孤寒玳重山妻語霜前芟製完
讀徐日方留山草

病客晝臥秋夢夢發函忽自來吳楓青天繚繞飛烟
虹裂石迸泉流枕中一字一洗雕繪窮鼓吹白雲賡
水公此間贈繳高秋風毋使慕者收冥鴻

送侯郡伯守鄖陽

渴雨生晴溢月流一天離色近中秋白雲出守符分
虎赤地來畊劍易牛寒水葉飛江北樹夕陽山在郡
西樓題書好問瀟湘鴈可向冰霜作置郵

吳元翰還莆次贈

見君如昨別如今秋雨秋風悔出林仙履不知家路
遠絮袍應奈野寒深山中玉板師無恙海上金鵝燕
可尋我未得歸偏送客燕歌慷慨變吳吟

李水部使楚楊廷尉使蜀

兩歲比鄰千古心曾無一日不相尋未承天語秋風
起難緩星期夜雨深酌酒弔湘駟水族停驂逢阮說
家林歸程未必分吳楚好記梅花杖雪臨

蜀天高踴雪峯寒未到能先十日看 聖主命將應
念遠使臣行矣不辭難猿聲訴月更三轉馬首分雲
棧幾盤滿着郢筒春萬里相邀須傍百花闌

懷王元直

十年書不報幾便負霜鴻神去此身病行長吾力窮
覆廬榕葉暗澹酒荔枝紅猶記脫驂日相期雲水東

寄林宗

風吹寺門掩星挂空林秋昨日此時別一年人獨愁
山中自爲侶衣鳥生空香小憇便一日花間流水忙
八月十五夜看月

空凝露絲冷輝輝香散風花酒滿衣隣杵不知聲外
怨旅人都向望中歸乍離邊塞雲霄近未轉梧桐鳥
鵲飛莫話去年秋更好昨宵先暈數重圍

友夏田祖安期聖胎晉侯夜過

月出夜如失氣寒秋乍分永懷披朗照高影墮空雲
虫語不多遠鴈過非一羣最奇纔到客猶帶卯時醺
于司直雲上園同安期友夏良季公亮彥琢

樹樹帶霜色不知秋幾深地宜生獨見人事得幽尋
隣衲送香梵牀書窺宿禽吾家荒逕在於此寄歸心
次良鄉觀米仲詔憲長所移奇石

塔窪村北野草荒草間突兀孤雲蒼欲行不行氣若
鬱將雨未雨天無光云是米家鑿山出百步千人移
數日到此躊躇不肯前秦鞭無技楚力詘大本縱橫
倒一林相爲枕藉歲年深或需天手妙神用或眷山
祇萌故心我與之言叱之起幾時得渡渾河水唵呀
空洞宿陰霆鯨脊鰲簪立奇鬼主人好禮尊石公神
物亦豈甘牢籠不如就此樹高閣居處即對飛來峯

甲子九日集茅孝若邸中同賦八韻

九九節爲陽新晴覺雨香隔林吹帽葉昨夜授衣霜
時地同千載天人會一方爭須仿燕玉到卽據胡牀
絃綺生泉響籬金散酒光渚鴻方刷羽沙蟹正輪芒
風氣東南至心期日夜將就酣當盼倩銷得鏡絲長

客夜送周虞卿

冷風吹壁月在窓夢人醒對酒滿缸易水無情夜歌
起洞庭已掛秋眉雙何論先到與先去茶口慕心同
一趣期君訪我梅花時家但梅花數千樹

送周安期

北風沙漠來新寒中吳紵零葉墮馬首一愁相對茹
予游困日月田園化洲渚黯淡眉上色躑躅意中許
歸期托君口欲語不能語

送倪封公

度支迎養意何如辛苦收租日不虛一着朝衣先問
寢夢中猶課五更書

長安騎馬當安車挈得歸心慰筭魚夾路秋紅楓柿

葉北徐州過望南徐

送胡子延

十月大風作寒鳥鳴枯枝久客豈無家中夜不敢思
斧爨屢遷次爾我朝夕斯賞識寓貞諒敗闕多所規
忽漫爲雲星天濶昧前期各勉山中業志力尚可師
三復謝公語吾常自教兒

歌送譚友夏

長安五月六月間塵汗濯衣人土斑此時此地一把

握相視不語何蕭閒舞鸞寺裡午鐘默落葉園中夜
蟹匿文心應手自爲命砍地劈天當不得西爽招邀
輕策理山間草木生愁喜僧飯出雲泉水香馬蹄踏
翠烟霜起曾約同游我未知歸來索我倦游詩傾斐
倒篋得殘草剔抹鴉塗皆導師只今友道在巖薹念
念食貧酷價多別似昔年歌處去一天江雪向寒河

寄聖僕

昨見金陵客知君客維揚落落破寺中風吹庭草芳
太守潔供具粲白蔬水香隨身惟開硯丹翠生古光
止卽懶于動不問星與霜懷人轉心轂素書無一行
但愁明月凍寒在西北方

送曹公振

菴居歷春夏共此鐘磬聲把握一二語古今千萬情
仲冬天地寒客子苦長征戒裝車且枳引酌杯難傾
淚落海波水飄散如雨萍東望苕雪間雲昏霜雪明
答許元燮花下見憶

十尺庭心片石傍梅花一樹蜜脾黃開時正及大寒
日香散滿天明月霜花底尊罍日日期醉歸還剪插
瓶枝看花念我燕山客兩歲花開兩寄詩

史滄如至

一出黃葉林不聞山水音未必皆龔俗何之無悔心
故人若行脚萬里能相尋及見弗作禮爲我彈鳴琴
得譚梁生西山見憶詩

杖底下斜曛衣邊掛蘚文搜竒如不及何暇念離羣
樹卽枯禪禮泉將裂布聞題詩散風葉飛共出山雲
寒夜喜開美無卿過存病起

一寂芥水響衆寒歸獨居相過無旦晚爲念復何如
燕筑堪娛酒吳庖解炙魚日歸誰得早勿藥報家書
大雪日雪山陰余望之載酒寓齋適西方僧持
潘獻明書至

風聲走簷壁默處何其寒之子履冰凜餉我林中餐
是日大雪日大雪飛長安長安盛宮闕嵯峨入雲端

光輝發朗曜四照皆明玕緇素後先到共此旦夕懽
傳示故人語秉燭洞肺肝

于司直雪後過訪不值

予方踏雪出門去君亦出門踏雪來去來數里不相
見孤負昨夜梅花開梅花苦憶江南折香山十月能
如雪今年花早雪較遲再雪好結香山期

紀別

甲子九月二日盧溝送楊師大洪作

湯湯一帶水濺沫皆水屑亭亭數株樹看人此離別

西翠寒不流東光淡如雪驢背客衣輕風沙吹片葉

入山

雪枯雲困石林疎幾處生烟響木魚不帶姓名誰得

問山中一日雨移居

冬至夜

出門三度夜寒深此夜空山鳥鳥林耿耿佛前光一
點分明慈母憶兒心

得君熙書頴

江陰六月片雲裁封寄燕山帶雪開知我憊游才已
盡夢花飛挾二君來

石上有懷

孤根齒齒啣冰槎冰底泉聲繞去斜想見昨游虛坐
處曾將雲袖拂苔花

仁卿別

來此何聞去何見塵凍裂衣風削面執馭仍呼辮髮
奴挈裝祗有如田研欵段出城嘶曉鴻行知到卽是

齊東念子十日五日內猶傍碧雲僧藥籠

山居聞倪樸臣使南挈同吳翁暫還金陵遙送

五言四解

車駕已麟麟天星猶歷歷行亟胡其然使君銜命出
驂驪孰與俱躩蹠秘書老相顧說江南春流綠應早
予有賣漿家亦在金陵市垂楊着地垂門前馬堪繫
今日東郭餞允爲西爽悞折贈松樹枝生風可清路

山中寄子七

山翠疊空層復層日氣不煖松濤水來茲彌月只枯
坐自照一如黃面僧聞君昨夜會賓友虹飲雪缸花
壓燈獨往無由卽雲上遙擲挂瓢千歲藤

別寓君

雖非乍交與面對宛如初聲影互相借寒暄移獨居
自來無俗客聊可當家書別意滿幽抱清風吹短裾

客夜

獨臥酒不醒夜帳風吹開燈影黯離夢梅花香自來

除夕東以寧

此夜三在此此復徙居三動心隨星杓搖搖指東南
積慮如縑絲續續吐吳蠶豈無同懷子傾懷相與談
明膏鑒默坐返顧生獨慚久負湖上春兩山交翠嵐
元日同以寧醉宿梅下

開歲一日春四日客掩半扉曾未出對君各數出山
時百轉腸枯指難屈簷鵲罷喧雞欲棲酒榻移傍梅
花低冷香吹夢夢不遠不在城東應在西

戴元長至

幾見春江綠勞思不能渡詎知把握時
渾河且南湖東風吹薄寒新草承幽步
君馬自軒翔歷塊空烟霧尋鍾毓甫
不得寄之

湖上詩成病客眠烟波香火至今傳
那知老去纔相識醉倚紅兒說少年

樓頭尊酒夕陽低城外東風散馬蹄
會問所居今不記誰家門對井闌西

春夜集寓齋送顧諤明

得深字

促席傍花陰餘寒容易侵君方問行李誰不寄歸心
遠棹遲春水疎星在曙林未離猶此夜瓊重酒杯深
早過余望之
拂曙尋君君尚眠書聲滿屋起茶烟樵青灑掃春雲
綠風落瓶花硯水邊

天郎探月樓

高樓出雲雲在天天風不動春無烟花簾盡揭海東

面夜白如水杯如船不知明月落吾手長吸清光當
天酒銀宮雪窟羽衣人一曲醉若君醉否

與張龍生夜別

離酒黯不綠與花相對飲櫺風乘間入孤檠落餘燼
假笑向雙玉分宵於半寢所期湖上尋春波弄舟穩

題邵僧彌蛺蝶圖

芳園霽春日花處皆香寢戲蝶不單飛飛飛墮新粉

韓孟郁熊羽人夜飲寓齋賦別

紅燈炙酒花氣酣細雨細風香濕簷春殘復作有情
別官冷得於高卧堪一片沙黃分薊馬千家柘綠養
吳蠶知君不問中人產何處好山無半龕

草橋圖

烟空無際野橋橫橋上盈盈一點情我出春明應且
暮不知誰向夢中行

美人水中景

風生春欲動溯洞皆豔香却怯水無情照妍不並郎

坐見楊花

東風已倦吹似憑餘力送一點一年心心心是歸夢
雨中僧送花

幽花非一香種種盡竒絕帶雨帶烟春無情有情折
送譚梁生

薊門三月盡春與別如期衣畔柳無色馬前風有絲
白雲遵海路芳草到家時相憶慢亭上出君遙贈詩
送顧仲從

草色不分天不知春去邊落花香店酒荒月野橋烟
且住無多話兼程一半船逢人訊歸日今日已三年
夜飲余望之庭中惜別

幽戀得君情客心無此營引花同避席留月到開城
露酒散空碧風經生夜清僕夫相顧語明日可能行
留別于司直

早雨吹寒淺餘紅入夏新徘徊當別路猶似未歸人
蝶趁園開酒鶯催馬蹴茵故心遙在望天地不生塵

在

年

大

開

年

年



